

Meeqqat inuusuttullu sumiginnagaasut ikilisinniarlugit nuna tamakkerlugu iliuusissatut pilersaarummik kingusinnerpaamik UKA2019-mi saqqummiunneqartussamik Naalakkersuisut suliaqarnissaat pillugu Inatsisartuni aalajangiiffigisassatut siunnersuut.

(Inuit Ataqtigiit Inatsisartuni ilaasortaataitanit saqqummiunneqartoq)

pillugu

Ilaqtariinnermut Peqqissutsimullu Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Ataatsimiititaliap suliarinninnermini makku ilaasortarai:

Inatsisartunut ilaasortaq Laura Táunâjik, Siumut, siulittaasoq
Inatsisartunut ilaasortaq Stine Egede, Inuit Ataqtigiit, siulittaasup tullia
Inatsisartunut ilaasortaq Jess Svane, Siumut
Inatsisartunut ilaasortaq Aqqaluk Heilmann, Atassut
Inatsisartunut ilaasortaq Malene Vahl Rasmussen, Demokraatit
Inatsisartunut ilaasortaq Mikivsuk Thomassen, Inuit Ataqtigiit
Inatsisartunut ilaasortaq Aqqa Samuelsen, Inuit Ataqtigiit

UKA 2018-imi ulloq 31. oktober siullermeerinninnerup kingorna ataatsimiititaliap siunnersuut sukumiisumik misissorpaa.

1. Siunnersuutip imarisaa siunertaalu

Meeqqat inuusuttullu sumiginnakkat ikilisinniarlugit siunnerfilimmik nuna tamakkerlugu iliuusissatut pilersaarummik kingusinnerpaamik UKA 2019-imi Naalakkersuisut saqqummiussaqaasatut siunnersuuteqartup kissaatigaa.

2. Siunnersuutip Inatsisartunit siullermeerneqarnera

Siullermeerinnermi siunnersuut tamakkiisumik tapersorsorneqarpoq, tamannalu tunngavigalugu siunnersuut sukumiinerusumik nalilivigineqartussanngorlugu Ilaqtariinnermut Peqqissutsimullu Ataatsimiititaliamut innersuunneqarpoq.

3. Ataatsimiititaliap siunnersuummik suliaqarnera

Nunatsinni meeqqat inuusuttullu sumiginnakkat amerlassusaasa ikilisinneqarnissaat

pingaaruteqartorujussuuvoq, sunaluunniit sumiginnaaneq inuttut inuiaqatigiinnullu annertuumik sunniuteqartarmat.

Meeqqanik inuusuttunillu sumiginnaasarnerup akuerineqanngilluinnarnissaa Ilaqutariinnermut Peqqissutsimullu Ataatsimiititaliamit siusinersukkulli oqaatigineqareerpoq.

Meeqqat Illersuisuannik, siunnersuummik tamakkiisumik tapersersuisumik, UKA 2018-imi ataatsimiititaliaq ataatsimeeqateqarpoq.

Meeqqat Pillugit Isumaqatigiissut, naalakkersuinikkut akuerineqartoq, tamakkiisumik nunarput suli malinninngitsoq Meeqqat Illersuisuata ilanngullugu erseqqissaatigaa. Meeqqat inuusuttullu ingerlalluannngitsut suli amerlasoorpassuusut, tamanna naak meeqqat inuusuttullu taakkulu ilaquataasa atugaat pitsaanerulernissaat nuna tamakkerlugu naalakkersuinikkut suliaqarnermi sammineqaraluartoq Meeqqat Illersuiata kingullermik nalunaarusiaani allassimavoq.

Pineqartup annertuumik suliniarfigineqarnerata ingerlaannarnissaanik ataatsimiititaliamit isumaqarfigineqarpoq, iliuusissat suliniutillu iluarsivigineqartarnerat ingerlaannartariaqarpoq, taamaaliornikkut kissaatigineqartut sunniuteqarsinnaaqqullugu. Naalakkersuisut, kommunillu pineqartumilu ajornartorsiutit pillugit suliaqartut allat akornanni maannaminngarnit ersarinnerusumik annertunerusumillu oqaloqatigiittoqartarnissaa aalajangiisuulluinnarpoq, taamaalilluni sumiginnaasarneq atuuttoq siunnerfilimmik suliniarfigineqarsinnaaniassammat. Nukiit pitsaasut tamarmik sulissapput sumiginnaasarnerullu nungutinneqarnissaanut ikioqatigiittoqarluni.

Suna tamarmi pitsaasumik ingerlassappat angajoqqaat ilaquataasullu isumassuisussaapput, tamatumunngalu akisussaaffeqarlutik. Taamaattumik tamatumunnga siunnerfilimmik sulineq ingerlaannartariaqarpoq. Tamatumunnga atatillugu ilaqutariinnut politikkipissap Naalakkersuisunit nalunaarutiginiarneqartoq ataatsimiititaliamit qilanaarineqarpoq.

Iliuusissatut pilersaarummi inuiaqatigiit tamarmik peqataatinneqarnissaat, matumani ilanngullugu oqartussat akornanni oqaloqatigiittoqarnissaata suleqatigiittoqarnissaata ataqatigiissaarisuqarnissaata saniatigut Naalakkersuisut ataanni susasaqarfiit tamarmik peqataaffigisaannik suliniarnermi tamakkiisumik isigisumik ataqatigiissaarinermi iliuusissatut pilersaarutip tunngavilersorneqarnissaa pingaaruteqarluinnarmat ataatsimiititaliamit ersarissumik erseqqissaassutigineqassaaq. Siullertut ataatsimiititaliamit eqqarsaatigineqarput kommunit politiillu.

4. Siunnersuutip aningaasatigut kingunerisassai

Nuna tamakkerlugu iliuusissatut pilersaarummik suliaqarnissamut 500.000 kr.-t nalinginik Naalakkersuisunit aningaasartuutaanissaa siunnersuuteqartumit missingerneqarpoq.

Siunnersuutip piviusunnngortinneqarnissaanut aningaasartuutissanut tunngatillugu allaanerumik naliliinissaminut ataatsimiititaliaq tunngavissaqanngilaq.

5. Ataatsimiititaliap inassuteqaataa

Siunnersuut ilusimisut iluseqartillugu akuerineqassasoq ataatsimiititaliap isumaqatigiittup inassutigaa.

Taama oqaaseqarluni isumaliutissiissummilu oqaatigineqartunut paasinnilluni siunnersuut ataatsimiititaliap aappassaaniigassanngortippaa.

Laura Táunâjik
Siulittaasoq

Stine Egede
Siulittaasup tullia

Jess Svane

Aqqaluk Heilmann

Malene Vahl Rasmussen

Mikivsuk Thomassen

Aqqa Samuelson